

## Imarsiornerup isumannaatsuunissaa pillugu inatsisip Kalaallit Nunaannut atortuulersinneqarnissaa pillugu peqqussut

Imarsiornerup isumannaatsuunissaa pillugu inatsimmi § 36, tak. inatsimmik nalunaarut nr. 627 26. juli 2002-meersoq, imarsiornerup isumannaatsuunissaa pillugu inatsisip allanngortinneqarnera pillugu inatsimmi nr. 1465-imi 22. december 2004-meersumi § 3, imarsiornerup isumannaatsuunissaa pillugu inatsisip imarsiortullu pillugit inatsisip allanngortinneqarneri pillugu inatsimmi nr. 547-mi 8. juni 2006-imeersuni § 4 aamma ilisimasortat pillugit inatsimmi nr. 567-imi 9. juni 2006-imeersumi § 38 aamma imarsiornerup isumannaatsuunissaa, umiartortut aamma imarsiorneq pillugit inatsimmi nr. 349, 18. april 2007-imeersumi § 1 naapertorlugit aalajangersarneqarpoq imarsiornerup isumannaatsuunissaa pillugu inatsit Kalaallit Nunaannut atortuussasoq imaattunik oqaasertaqartillugu:

### Kapitali 1

#### *Inatsisip danskit nunanilu allamiut umiarsuaani atuuffii*

§ 1. Inatsit atortuutinneqassaaq danskit umiarsuaanut, umiarsuillu Kalaallit Nunaannut nalunaarsorsimasut ilanngullugit eqqarsaatigalugit. Taamaattorli kapitali 3, § 17, imm. 3, aamma kapitali 12 umiarsuarnut sorsuutitut umiarsuarnullu sakkutuunik angallassitutitut kisimi atortuutinneqassapput.

*Imm. 2.* Aningaasaqarnermut inuussutissarsiornermullu ministeri tigussaasut suut umiarsuarnut isigineqassanersut pillugit maleruagassanik aalajangersaasinnaavoq.

*Imm. 3.* Aningaasaqarnermut inuussutissarsiornermullu ministeri inatsisip, taannalu naapertorlugu najoqqutassat tunniunneqartut, pillugit danskit nunanilu allamiut umiarsuaannut allanut kalaallit umiarsualiviiniittunut, kalaallit oqartussaaffigisatut imartaaniittunut, killeqarfinnut aningaasarsiorfiusuniittunut kiisalu Kalaallit Nunaata nunavittaani immamit qallersimasumiittunut aalisarnikkullu oqartussaaffigisaniittunut maleruagassanik aalajangersaasinnaavoq. Savalimmiormiut umiarsuai inatsimmi matumani umiarsuarnut nunani allani nalunaarsorsimasunut naleqqiunneqassapput.

### Kapitali 2

#### *Umiarsuit sananeqartarneri, pisatsersuutaat ingerlanneqarnerallu il.il. pillugit maleruagqusalialat*

§ 2. Umiarsuit tamarmik sananeqarsimasuussapput pisatsersorneqarlutillu unuit umiartortut inuunerat naammattumik isumannaatsuusussanngorlugu, aammalu sukkulluunniit atornerqarfissaminnut piukkunnartunngorlugit. Sapinngisamik immamik minngersaannginnissaat isumagineqassaaq.

*Imm. 2.* Umiarsuaq pilersorsimassaaq ingerlavimmini sumiissusersiutinik maskiinanik, radiukkut, annanniutinik, nakorsaatinik aammalu ikuallattoornaveequtinik qatserutinillu inuit umiarsuarmiittut, umiarsuup nammineq usiisalu ajortumiitsaaliornissaannut sapinngisamik naammattumik.

*Imm. 3.* Umiarsuarimi suliffiit inillu il.il. aaqqissuunneqarsimassapput sapinngisamik umiarsuarimi navialitsaaliinissaq peqqinnissarlu, umiarsuarimiittut uummarissuunissaat allallu ajoquserneqaataasinnaasunik sunniuteqartut pitsaaliornissaat isumagalugit.

*Imm. 4.* Umiarsuaq pilersorsimassaaq pisatsersuutinik sanaanik teknikikkullu aaqqissuussanik immanik minngersaanaveersaatissanik.

**§ 3.** Aningaasaqarnermut inuussutissarsiornermullu ministeri umiarsuit sananeqartarneri, pisatsersuutaat ingerlanneqarnerallu pillugit maleruagassiorsinnaavoq, aamma makku ilanngullugit eqqarsaatigalugit,

- 1) tamatumunnga atatillugu qaqugukkut najoqqutassallu suut naapertorlugit umiarsuaq misissoqissaarneqartassanersoq, ilisimasalinnit misissuiffigineqassanersoq, atortuutit akuerineqarnissaat misiligarneqarnissaallu, umiarsuup orrajaassusianut, usilersoreermermi killilerfissaanut itsineqqortussusissaanullu nalunaaqutsersuutinut piumasaqaatit, aamma umiarsuaatillip umiarsuullu naalagaata pisussaaffii pillugit,
- 2) inatsisit suut, maleruagqusaliat, certifikatit aamma umiarsuup allattaavii suut umiarsuarimiittinneqassanersut, aamma umiarsuarmit mingutsitsinerit pinngitsoortinniarnannut atatillugu umiarsuarimi pilersaarutit ilanngullugit eqqarsaatigalugit, kiisalu ilisimasalinnit misissuinerit allattuiffiit umiarsuarimiittussat, aamma immikkut akuerisaanerit, pequsersuinerit allattuiffinnullu allattuinerit, kiisalu aamma allagarsiussat suut umiarsuup iluani nivingatinneqassanersut,
- 3) mingutsitsinaveersaarnermut atatillugu umiarsuup journalii, matumanilu journalit akuersissutigisaanerit taakkualu allattornissaannut toqqortarineqarnerannullu akisussaaffiginninneq ilanngullugu eqqarsaatigalugu kiisalu tamatumunnga nakkutilliineq,
- 4) imarsiornermi isumannaallisaaneq, umiarsuarmit peqqarniisaarsinnaanerit il.il. pinngitsoortinniarnissaat eqqarsaatigalugu,
- 5) atortutigit ikiuutissat atortuutillu, tamakkua aaqqissuunnerat nalunaaqutsersugaanerallu, atornerqarfissaat, aserfallatsaalinissaat paarineqarnissaallu, navialitsaaliuilluni sulineq, umiarsuarimi inuttat umiarsuarimi sulinerannut inuunerannullu atugaannut atatillugu sulisitsisuusup pisussaaffii, matumanilu isumannaallisaanerit peqqissutsimullu atukkat ilanngullugit eqqarsaatigalugit, umiarsuarimi sulinerit, Kalaallit Nunaanni sulineri avatangiisit pillugit inatsimmi pineqanngitsut, ingerlanneqarnerini pisussaaffiusut,
- 6) umiarsuarimi pissutsit navialitsaaliuinerit, qatserisarnerit annassiniarnermullu tunngasut, umiarsuarimi peqqinnissakkut eqqiluitsuutitsinikkullu pissutsit, nappaatinik katsorsaasartut peqqinnissakkut ilinniagaqarnerat, sulianut atasumik nakorsanut misissortittarnissaat, tamatumunnga atasumik aningaasartuutit akilerneqartarnerat, kiisalu sulisitsisuusup sulisuusullu tamatumunnga pisussaaffii,
- 7) umiarsuarimi officerit allallu umiarsuarimi pisortatut atorfeqartitat akisussaaffigisassaat,
- 8) isertortunik ilaasoqarnaveersaarnissaq kiisalu taamatut ilaasut umiarsuarimi qanoq iliorfigineqartarnerat,
- 9) usinik ulorianaatilinnik allanillu umiarsuarmit inuillu inuunerannik navialitsaaliuinissaq kiisalu immamik mingutsitsinaveersaarinnissaq pillugit immikkut iliuuseqarfigisariaqartunik nalunaaqutsersuineq, usilersorneq, assartuineq usingiaanerlu, matumanilu umiarsuarmit pooqanngitsunik annertuunillu usisartunik usilersuinerit usingiaanerimullu quersuarmit sulisuusut aqutsinerannut aaqqissuussat, aamma
- 10) uumasunik umatillugit assartuineq.

§ 4. Aningaasaqarnermut inuussutissarsiornermullu ministeri maleruagassiorsinnaavoq angallatit nuannaariartaatit piginnittussaminnut tunniunneqartarnerat, nioqqutaanerat sananeqartarnerallu, pisatsersuutit, inuttaasunut navialitsaaliuutit allallu atortussiat umiarsuarmit atorineqartussat pillugit.

*Imm. 2.* Aningaasaqarnermut inuussutissarsiornermullu ministeri pissutsit nassitsisuusup imaatigut usinik assartuinermit malitassai pillugit maleruagassiorsinnaavoq.

*Imm. 3.* Aningaasaqarnermut inuussutissarsiornermullu ministeri danskit umiarsuaannut umiarsuarnullu Kalaallit Nunaannut nalunaarsorsimasunut tunngatillugu imarsiornermit kiisalu imarsiornermit allatigut Kalaallit Nunaannut Danmarkimulluunniit attuumassutilimmik ajunaarnernik misissuisarnermut maleruagassiusaaq, tamatumanilu ukua ilanngullugit eqqarsaatigalugit

- 1) imarsiornermit ajutoornernut atatillugu umiarsuup aseqqukuinik nalunaarutiginnittussaatitaaneq piiaanissarlu misissuinissamut periarfissat isumannaallisarnissaat eqqarsaatigalugu,
- 2) nunani allani oqartussaasunik suleqateqarnissaq,
- 3) misissuinerup inaarneqarnissaata tungaanut allagaatinik paasitinneqarsinnaatitaanerup killilersorneqarnissaa, aamma
- 4) misissuinerit pillugit nalunaarusianik tamanut nalunaarutiginninneq, matumanilu inuit peqqissusiannut paasissutissanut tunngasunik tamanut tusagassiarinninneq ilanngullugu eqqarsaatigalugu, tamatumani siunissami ajutoorsinnaanerit taakkualuunniit kingunerisinnaasaannik killilersimaartitsiniarnerit pillugit tamanna pissasoq.

*Imm. 4.* Angallammik niuerutiginnittoq imaluunniit imm. 1-imi taaneqartutut nioqqutissianik tuniniaasoq, aalajangersaaffeqarninilu naapertorlugu atuunnermini isumannaatsuunissamut, peqqinnissamut avatangiisinulluunniit ulorianartorsioritissinnaasoq, tamatuma pinngitsoortinnissaa pillugu pisariaqavissumik iliuseqarnissaa pillugu Søfartsstyrelsen peqqussuteqarfigisinnaavaa. Tamatumunnga ilanngullugit uku peqqussutigineqarsinnaapput,

- 1) angallatinik nioqqutissianilluunniit pineqartunik tunniussineq tuniniaanerluunniit unitsinneqassasoq, aamma
- 2) nioqqutissiat angallatilluunniit pineqartut niuerfiusunit utertinneqassasut.

§ 5. Umiarsualiat §§ 3 aamma 4 malillugit maleruagassiat nutaat atortuulerfianni kujaalernerqareersimasut, imaluunniit tamatumunnga nallersuunneqarsinnaasumik killiffilimmik sananeqalereersimasut pillugit aalajangersarneqarsinnaavoq, malittarisassat nutaat ilaannaalluunniit atortinneqassasut. Tamatumani tunngaviginiarneqassapput mingutsitsinaveersaarnissaq, pissutsit navialitsaaliuinissamut peqqinnissamullu tunngasut kiisalu umiarsuup qanoq ittuunera sumullu atorineqarnissaa.

*Imm. 2.* Umiarsuit 20-t inorlugit BRT-llit imaluunniit 20-t inorlugit tamakkiisumik usitussusillit 15 meterillu inorlugit takissusillit aammalu umiarsuit allanngutsaaliorniakkat pillugit maleruagassat sakkukinnerusut, § 2-mi aalajangersakkanik allaanerusut, aalajangersarneqarsinnaapput.

### Kapitali 3

#### *Umiartornermi il.il. iliussissatigut malittarisassat*

§ 6. Aningaasaqarnermut inuussutissarsiornermullu ministeri umiartornerup isumannaatsuunissaanut, torersaarnissamut malittarisassanik eqqutitsiniarnissamut aammalu umiartornermit akornuteqanngitsumik ingerlaarsinnaanissamut malittarisassiorsinnaavoq, iliussissanik aalajangiisarsinnaalluni aammalu tamanut ataasiakkaallu pillugit nalunaaruteqarlunilu

aalajangersimasutigut inerteqquteqarsinnaavoq imaluunniit peqqussuteqarsinnaalluni, aamma makku ilanngullugit eqqarsaatigalugit,

- 1) imartani immikkut ittuni umiartornissap, aalisarnissap, kisarnissap imaanullu aqqarnissap inerteqqutaanera,
- 2) imaani aqqutissat pillugit maleruagassat, sukkassutsimut killilersuutit pillugit aalajangersumik ingerlaarfeqarnissaq,
- 3) nalunaaruteqarnermi periaatsit aalajangersumillu ingerlaarfeqarnermi periaasissat, radarikkut alaatsinaarinissaq angallatinik tikitseqqusinnginnermi atugassianik atuinissaq,
- 4) ikaartaatit sukkasuut akuersissutigineqartarnerat,
- 5) ikaartarfiit,
- 6) kabelit imaaniittut ruujorillu immap naqqatigoortut innarlitsaaliornissaat,
- 7) torersaarnissamut aammalu imaani puttasuliat assigisaasalu eqqaani tamakkunanilu sulinernut atasumik ulorianartorsiornaveersaarnissaq pillugit killilersuutaasunik malinninnissaq atortitsiinnarnissarlu,
- 8) umiarsuarni alapernaarsuisartoqarneq aamma
- 9) imaani inuup inuuneranik annaassiniarnermut ikiuunnissaq.

§ 7. Aningaasaqarnermut inuussutissarsiornermullu ministeri umiarsuarmi Kalaallit Nunaanni nalunaarsorneqarsimasumi naalakkamut kimulluunniit peqqusisinnaavoq silasiornikkut paasisanik tigooraaneq nassitseqqinnerluunniit aqqutigalugit umiartornerup isumannaatsuunissaanut piumasarineqartutut silasiorfinnut ikiuunnissaq pillugu.

*Imm. 2.* Angallannermut ministeri Aningaasaqarnermut inuussutissarsiornermullu ministerimik oqaloqatiginnereernikkut pisariaqartinneqartunik iliuusissiusaaq nunat tamalaat umiarsuartigut angallannerup isumannaatsuunissaanut silasiornikkut sullissineranni Danmarkip peqataanissaa pillugu.

§ 8. Pissutsit tamanna pisariaqartissappassuk, Illersornissamut ministerip erseqqinnerusumik aalajangiinera malillugu sumiissusersiornikkut periaasissiortoqarlunilu nalunaaqutsersuisoqassaaq Danmarkimi nalunaaqutsersuiffiusuni umiartornermut kisarsimaarfissanillu sumiissusersinissanut ikiuutissanik.

*Imm. 2.* Imartani pingaarnerni aammalu aqqusaarneqartartuni umiartornermut isumannaatsunillu kisarsimaarfissanut sumiissusersiunikkut periaasissiorneq nalunaaqutsersuinerlu tamakkuninngalu aserfallatsaaliineq ingerlanneqassapput Farvandsvæsenip suliniuteqarneratigut naalagaaffiup akiligassaannik.

*Imm. 3.* Sumiissusersiunikkut periaatsit nalunaaqutsersuinerlu imm. 2-mi pineqanngitsut ingerlanneqarlutillu aserfallatsaaliorneqassapput umiarsualivinnut aqutsisoqarfimmit, ikaartarfiit pillugit siulersuisunit il.il. susasaqartunit, aamma tamatumunnga atasumik aningaasartuutinik akiliisussanit.

*Imm. 4.* Immikkoortup 2-p 3-llu akornanni killiliinikkut apeqqutit Illersornissamut ministerimit aalajangiiffigineqassapput.

## Kapitali 4

### *Nalinginnaasumik pisussaaffiit*

§ 9. Umiarsuaatillip isumagissavaa, kukkunerit amigaatilluunniit ilisimalikkami iluarsanneqarnissaat, nakkutigissavaalu umiarsuup inatsisit malillugit misissorneqartarnissaa

atuuttumillu certifikatilerneqartarnissaa. Umiarsuaatillip aamma qularnaassavaa umiarsuup naalagaata pisussaaffinnik imminut pisussaaffiliussanik naammassinnissinnaanissaa.

**§ 10.** Umiarsuup naalagaata isumagissavaa, navialitsaaliuinikkut peqqinnissakkullu aarlerinaateqannginnissaa, aammalu umiarsuarmi suliat aaqqissuunneqarsinnaanissaat navialitsaaliuinikkut peqqinnissakkullu aarlerinaateqanngitsumik ingerlanneqarsinnaanngorlugit. Umiarsuup naalagaata aamma isumagissavaa imaanik mingutsitsinaveersaarinnissamat sananeqaatitigut teknikikkullu atortulersuutitigut peqqussutaasut aarlerinaateqannginnissaat siunertanullu atorneqarsinnaasuunissaat.

**§ 11.** Kialuunniit, umiarsuarmi sulianik siulersuisuusup, isumagissavaa ajunaarnissamat peqqinnissakkullu ulorianaatilinnit sunnerneqarnissamat naleqquttunik illersuuteqarnissaat, aammalu ilitersuinikkut nakkutilliinikkullu qularnaassavaa, sulinerup isumannaatsumik ingerlanneqarnissaa ajunaarfiusinnaasut peqqinnissakkullu ulorianaateqarsinnaasut sianigalugit.

**§ 12.** Umiarsuarmi atorfeqartitaasut peqataaffigissavaat iliuusissat, ajunaatsaaliuiniutaasut imaluunniit ajoqusiisinnaasunit sunniivigineqarnissamat illersuutaasut pissusissamittut atorsinnaasuunissaat.

**§ 13.** Kikkulluunniit umiarsuarmiittut pisussaapput navialitsaaliuiniutitut umiarsuarmi umiarsuup imarsiutikkuminartuunissaa umiarsuarmiittullu isumannaatsuutinnissaat pillugit aalajangersakkat ataqqissallugit.

## Kapitali 5

### *Uninngagallartussanngortitaaneq umiarsualivisseqqusaannginnerlu*

**§ 14.** Umiarsuup timitaani, maskiinaani, navialitsaaliutaani, ujaqqiutaasa usiisalu inissinneqarneranni inuttalerneqarneranilu kukkuneqarneratigut amigaateqarneratigulluunniit, imaluunniit umiarsuup aallartiinnarneratigut ingerlaannartinneratigulluunniit allanik patsiseqarluni inuit umiarsuarmiittut ajoqusernissaat mingutsitseriataarnissarlunniit ilimagisariaqassappat, Søfartsstyrelsi umiarsuaq uninngagallartussanngortissinnaavaa.

*Imm. 2.* Søfartsstyrelsi aammattaaq umiarsuarmik uninngagallartussanngortitsinnaavoq, umiarsuaq peqqussutaasunik certifikateqanngippat, allagaateqanngippat imaluunniit atortuuteqanngippat, imaluunniit taakku kukkunertaqarpata. Aammattaaq Søfartsstyrelsi umiarsuaq uninngagallartussanngortissinnaavaa umiarsuaatilik, naalagaq allalluunniit taakku sinnerlugit iliorsinnaatitaasoq, Søfartsstyrelsi pisussaaffimminik naammassinninniarneranut akornusersuippata.

*Imm. 3.* Silap pissusai iluarinartuunngitsut pissutigalugit umiarsuup umiarsualivimmit avalannissaanut inerteqqummik tunniussisarnermut maleruagassanik Søfartsstyrelsi aalajangersaasinnaavoq.

*Imm. 4.* Umiarsuup uninngatiinnarneqarnissaanik aalajangiineq sapinngisamik piaartumik umiarsuup naalagaanut imaluunniit umiarsuaatillimmut imaluunniit allamut, taakku sinnerlugit iliorsinnaatitaasumut nalunaarutigineqassaaq, uninngatiinnarneqarneranut pissutaasut aallartinneqarnissaanullu patsisissaatitat ilanngullugit. Umiarsuup ingerlaqqissinnaatitaanissaa Søfartsstyrelsi patsisissalersinnaavaa umiarsuup certifikatiinik suliarinnittup taakkaa atuinnaartinnissaannik misissoreerlugulu upernarsareersimassagaa piunarsaqaatigalugu.

*Imm. 5.* Søfartsstyrelsi sulissutigisinnaavaa umiarsuaq aallatsaaliorniarlugu iliuusissanik maleruagassiornissaq. Nunani allani uninngagallartussanngormik aalajangiineq nunami uninngagallarfiusumi danskit aallartitaqarfiannut nalunaarutigineqartassaaq, Søfartsstyrelsimiit qinnuigineqarnikkut umiarsuup aallatsaaliornissaanut iliuusissanik malittarisassiornissamik sulissutiginnittussamut.

§ 15. Søfartsstyrelsi umiarsualivinnik tikitsinissamut inerteqquteqartitsisinnaavoq, tamanna EU-p maleruagassiaanik imaluunniit nunani tamalaani aalajangersakkanik inatsisitigut tunngaveqartillugu. Umiarsualivimmik tikitsinissamut inerteqqut tunniunneqareerpat, Søfartsstyrelsi akuerisinnaavaa kalaallit umiarsualiviannik aalajangersimasumik tikitsinissaq, umiarsuup ingerlaannarnissaa inuup inuuneranik annaasaqaataariataarsinnaappat, immatigut avatangiisinut ajoqusiisinaappat, imaluunniit isumannaatsuutitsinissaq pillugu pisariaqarneratut peqqussutaasut tamanna pisariaqartissappassuk, imaluunniit kukkunerit amigaatillu iluarsineqarnissaat siunertaralugu.

§ 16. Søfartsstyrelsimi sulisut taamaasiornissamut piginnaasuligaasut kisimik umiarsuarnik uninngagallartussanngortitsisinnaapput, tak. § 14, imm. 1 aamma 2. Taamaattorli umiarsualivinni nakkutilliisut (havnemesterit) Søfartsstyrelsimiit piginnaassusilerneqarsinnaapput umiarsuarnik unitsitsigallarnissamut.

*Imm. 2.* Søfartsstyrelsi nunat allat paasissutissisinnavaa aammalu umiarsuit uninngagallartussanngortitat imaluunniit umiarsualivinnik tikitseqqusaanngitsut pillugit paasissutissanik tamanut saqqummiussisinnaalluni, aamma selskabip umiarsuup klassilersorneqarfiata aqqa, assartuisitsisup aqqa il.il. uninngagallartussanngortitsinermullu imaluunniit tikitseqqusinnginnermut pissutigisat pillugit.

*Imm. 3.* Aningaasaqarnermut inuussutissarsiornermullu ministeri erseqqinnerusumik malittarisassiorsinnaavoq Søfartsstyrelsi umiarsuarnik uninngagallartussanngortitsisarnissaa pillugu aammalu umiarsualivinnik tikitsinissamut inerteqquteqarnissaa, matumanilu politiinut umiarsualivinnilu pisortat oqartussaataannut kalerriisarneq ilanngullugu eqqarsaatigalugu. Aammattaaq Aningaasaqarnermut inuussutissarsiornermullu ministeri uninngagallartussanngortitsinerup umiarsualivinnullu tikitseqqusinnginnerup atorunnaarsinnissaanut iliuusissat aammalu piumasaqaatissat pillugit maleruagassanik aalajangersaasinnaavoq.

*Imm. 4.* Søfartsstyrelsi umiarsuarnik uninngagallartussanngortitsinermik aamma tikitsaaliuinerneq aalajangiinera umiarsuaatilinnit susassaartunit Ankenævnet for Søfartsforholdimut saqqummiunneqarsinnaavoq.

## Kapitali 6

### *Nakkutilliineq il.il.*

§ 17. Aningaasaqarnermut inuussutissarsiornermullu ministeri inatsimmi matumani aqutsinikkut qullersaalluni oqartussaavoq, taamaattoq tak. imm. 3, § 7, imm. 2, § 8 aamma § 21 imm. 2.

*Imm. 2.* Søfartsstyrelsi inatsimmik matuminnga aqutsinermut isumaginnittussaavoq, taamaattoq tak. § 7, imm. 2, aamma § 8, suliassaraalu

- 1) nakkutigissallugu, inatsisip aamma malittarisassat, peqqussutit inerteqqutillu inatsit naapertorlugu aalajangersarneqartut malinneqarnissaat,

- 2) umiarsuup sumut atorneqarnissaata akuersissutiginnissaa, ilanngullugit angallavigisassaaq akuerisaaq ilaasullu amerlassusissaat, tamatumunngalu atatillugu certifikatinik uppersaatinillu allanik suliarinnittarnissaaq aamma
- 3) inatsisip atuuffiini teknikikkut inuttullu atugarisatigit ingerlaatsit pillugit ilisimatinneqartarnissaaq, aammalu umiarsuarnik navialitsaaliuinikkut, peqqinnissakkut avatangiisitigullu taakkualu pisatsersuutaasigut ingerlanneqarnerisigullu pitsaangorsaaviginninnerni peqataanissaaq.

*Imm. 3.* Illersornissamut ministeri malittarisassiorsinnaavoq § 1, imm. 2-mi oqaaseqatigiit aappaanni umiarsuit taaneqartut pillugit isumannaatsuutitsinissap peqqinnissallu tungaasigut. Malittarisassani oqaaseqatigiinni siullerni taaneqartunik naammassinninnissaaq illersornissamut ministerimit nakkutigineqassaaq.

*Imm. 4.* Illersornissamut ministeri uuttortaanikkut sumiissusersiuineri atortunik nalunaaqutsersuutinillu nakkutiginnittuusaaq aammalu Aningaasaqarnermut inuussutissarsiornermullu ministeri isumaqatiginiareerlugu tamakku pillugit erseqqinnerusumik maleruagassiorsinnaalluni, matumanilu maleruagassat nunani allamiut umiarsuaannut atorneqarnissaaq pillugu ilanngullugu eqqarsaatigalugu.

*Imm. 5.* Aningaasaqarnermut inuussutissarsiornermullu ministerip Søfartsstyrelsi piginnaassusilersinnaavaa pisussaaffinnik, inatsimmi matumani Aningaasaqarnermut inuussutissarsiornermullu ministerimut pisussaaffiliussanik ingerlassinissamut.

*Imm. 6.* Ministeri inatsit una naapertorlugu najoqqutassiat tunniunneqartut pillugit nalunaarutiginninnermut maleruagassanik aalajangersaasinnaavoq aammalu aalajangersinnaallugu inatsimmi pineqartut iluanni nunani tamalaani akuersissutigineqartut atuutinnissaaq, taakkua qallunaatut kalaallisulluunniit naqitaanerata apeqquataatinnagu. Aammattaaq ministerip aalajangersinnaavaa umiarsuit najoqqutassiat klassilersuisarnermut ingerlatseqatigiiffinit il.il. akuerisaasunit aalajangersarneqarsimasut eqquutsissagaat, taakkua qallunaatut kalaallisulluunniit naqitaanerata apeqquataatinnagu.

*Imm. 7.* Aningaasaqarnermut inuussutissarsiornermullu ministeri aamma ministerimut susassaartumut isumaqatigiissuteqarnikkut maleruagassiorsinnaavoq Søfartsstyrelsip pisortat oqartussaataannik allanik suleqatiginninnissaa pillugu aalajangiinnaallunilu, Aningaasaqarnermut inuussutissarsiornermullu ministerip Søfartsstyrelsilu inatsit malillugu pisussaaffiisa pisortat oqartussaataannit allanit isumagineqarnissaaq pillugu.

*Imm. 8.* Aningaasarsiornermut inuussutissarsiornermullu ministeri naammagittaalliorsinnaaneq pillugu maleruagassanik aalajangersaasinnaavoq, matumanilu inatsit una naapertorlugu Søfartsstyrelsip aamma pisortatut oqartussaasut allat aalajangigaat aqutsinikkut pisortanut allanut saqqummiunneqarsinnaannginnerat pillugu.

**§ 18.** Søfartsstyrelsip peqqussutigisinnaavaa, pissutsit inatsimmut malittarisassanulluunniit imaluunniit inatsit naapertorlugu aalajangiinernut akerliusut aqqiiviginiapallanneqarnissaaq imaluunniit erseqqinnerusumik piffissaliussap naannginnerani aqqiivigineqarnissaaq.

**§ 19.** Søfartsstyrelsimi suleqataasut, suliassarititaasunut atatillugu pisariaqarsorinassappat, sukkulluunniit kiussutsimut uppersaammik eqqortumik takutitsinikkut eqqartuussivik aalajangiinngikkalluartoq umiarsuarnut, inatsimmi pineqartunut, tamanut ikisinnaatitaapput, suliassatik suliariniarlugit. Oqaaseqatigiit siulliit taamatulli atuutinneqassapput umiarsuarnut sananeqartunut.

*Imm. 2.* Umiarsuarmik piginnittoq, naalagaq maskinschefilu taamatullu kikkulluunniit taakku sinnerlugit iliuseqartussaataasut, pisussaapput Søfartsstyrelsip misissuinerini pisariaqarneratut

ikiuunnissaminnut aammalu tamatumunnga atasumik paasiumasaannik tamanik paasissutissiiinissamut.

*Imm. 3.* (Kalaallit Nunaannut atortussaatinneqanngilaq).

*Imm. 4.* Søfartsstyrelsimi suleqataasut suliasarititaasunik ingerlatsinermi isumagissavaat, umiarsuarmik pisariaqanngitsumik kinguarsaanaveersaarnissaq, aammalu umiarsuarmi sulinerup pisariaqanngitsumik akornusersorneqannginnissaa.

**§ 20.** Aningaasaqarnermut inuussutissarsiornermullu ministeri umiarsuit danskit umiarsualiviinut, matumanilu kalaallit umiarsuarlivii ilanngullugit eqqarsaatigalugit, imaluunniit nunani allani umiarsualiviit ilanngullugit, tikitsitsinissamut atatillugu nalunaarutiginnittussaatitaaneq pillugu maleruagassanik aalajangersaasinnaavoq.

*Imm. 2.* Politiit, akileraarutitigut ilanngaaserisartut, sullivinnik nakkutilliisut aamma umiarsualivinnik pisortatut oqartussaasut, pissutsinik inatsimmut matumunnga imaluunniit inatsit naapertorlugu maleruagassianut akerliusunik ilisimasalikkaminnik Søfartsstyrelsimut kalerriisassapput. Pisortatut oqartussaasoq susassaartoq tamanna pillugu erseqqinnerusumik maleruagassiorsinnaavoq.

*Imm. 3.* Nakorsaq, inuup umiarsuarmi sulinerminut atatillugu ajoqusiisinnaasunik sunnertinneqarsimaneranik paasinnittoq pasitsaassaartoqarlunniit, sullivinnik nakkutilliisunut kalerriisaaq. Aningaasaqarnermut inuussutissarsiornermullu ministeri tamanna pillugu erseqqinnerusumik maleruagassiorsinnaavoq.

*Imm. 4.* Aningaasaqarnermut inuussutissarsiornermullu ministeri sulisilluni ajunaarnernik, toqunartulinnik sunnertinnernik, inuussutissarsiornermi nappaataalersartunik allanillu navialitsaaliuineranut peqqinnissamullu pingaarutilinnik nalunaarutiginnittarnissamut pisussaaneq pillugu maleruagassiorsinnaavoq.

## Kapitali 7

### *Umiartornermut tunngasunik naammagittaalliuuteqartarfik*

**§ 21.** Aningaasaqarnermut inuussutissarsiornermullu ministeri Ankenævn for Søfartsforholdimik pilersitsisaaq, umiarsuarnik uninngagallartitsineq pillugu naammagittaalliuutinik aamma danskit umiarsuarliviiinik tikitsinissamik inerteqqutinik, umiarsuarnut peqqussutinik inerteqqutinillu imaani avatangiisit illersorneqarnissaat pillugu inatsimmi § 43 imaluunniit § 43 a, imm. 1 imaluunniit 2 naapertorlugit umiarsuarnut nalunaarutigineqartut, umiarsuit inuttalersorneqarneri kiisalu umiartortut aalisartullu peqqinnissakkut umiarsuarni sulinissaminnut piukkunnaateqarnerisut umiartornermi nakorsat aalajangigaat.

*Imm. 2.* Aningaasaqarnermut inuussutissarsiornermullu ministerip imm. 1-imi taaneqartut saniatigut aalajangikkat pillugit naammagittaalliuutinik suliarinninneq Ankenævnet for Søfartsforholdimut nuussinnaavaa.

*Imm. 3.* Nævnip aalajangiineri aqutsinikkut pisortanut allanut saqqummiunneqarsinnaanngillat.

*Imm. 4.* Nævnimut ilaasortaapput siulittaasoq, eqqartuussisutut atorfeqartuussusaq, kiisalu ilaasortat immikkut ilisimasallit arlallit. Siulittaasumut kingoraartissaq toqqarneqarsinnaavoq. Nævnip ilaasortai immikkut ilisimasallit umiartornermut tunngasunik ilisimasaqartuussapput, matumanilu teknikikkut, umiartornermut imaluunniit umiartornermi katsorsaaserineranut pissutsit ilanngullugit eqqarsaatigalugit.



*Imm. 5.* Siulittaasoq aamma nævnip ilaasortai kiisalu siulittaasumut kingoraartissaq Aningaasaqarnermut inuussutissarsiornermullu ministerimit toqqarneqassapput ukiuni 4-ni atuuttussatut qinigaaqqinnissaannik periarfissaqartillugit.

*Imm. 6.* Sulianik ataasiakkaanik aalajangiinerni ilaasortat aalajangersimasut aalajangersakkat Aningaasaqarnermut inuussutissarsiornermullu ministerimit aalajangersarneqartut naapertorlugit siulittaasumit toqqarneqartut peqataassapput.

*Imm. 7.* Aningaasaqarnermut inuussutissarsiornermullu ministeri nævnip sulinera pillugu maleruagassanik aalajangersaassaaq, matumanilu nævnimi ilaasortanik toqqaaneq aammalu suliani ataasiakkaat suliarineqarneri pillugit siulittaasup nævnip ilaasortalersornera ilanngullugu eqqarsaatigalugu, kiisalu naammagittaalliuuteqarnissamut piffissarititaasoq sulianillu suliarinninneq.

*Imm. 8.* Søfartsstyrelsi Ankenævnet for Søfartsforholdimut allattoqarfiuvoq.

## Kapitali 8

### *Selskabit umiarsuarnik klassilersuisartut il.il.*

**§ 22.** Aningaasaqarnermut inuussutissarsiornermullu ministeri patsisissaatitat erseqqinnerusumik taasat tunngavigalugit selskabinut klassilersuisarfinnut, sullivinnut allanut inunnulluunniit ataasiakkaanut piginnaatitsissuteqarsinnaavoq Søfartsstyrelsi sinnerlugu umiarsuarnik misissuisarnissamut, matumanilu umiarsuit uuttortarnerinik naatsorsuisarnissanut misissuisarnissanullu, kiisalu certifikatiliisarnissamut ilanngullugit eqqarsaatigalugit.

*Imm. 2.* Aningaasaqarnermut inuussutissarsiornermullu ministeri patsisissaatitat erseqqinnerusumik tassat tunngavigalugit sullivinnut inunnulluunniit ataasiakkaanut piginnaatitsissuteqarsinnaavoq akuersissuteqartarnernik suliaqarnissamut aamma umiarsuarnik, umiarsuarmi pisatsersuutininik atortussianillu allanik, Søfartsstyrelsimit akuersissutigisanik, misissuiffiginninnissamut misiligaanissamullu.

*Imm. 3.* Aningaasaqarnermut inuussutissarsiornermullu ministeri misiligaanerit akuersissutigineqartarneri pillugu aamma akuersissutiginninnerit pillugit maleruagassanik aalajangersaasinnaavoq.

*Imm. 4.* Søfartsstyrelsi kukkussutinut imm. 1-imi 2-milu patsisissaatitat taasat tunngavigalugit sullivinnit il.il. taasanit piliarineqartunut taarsiissuteqarnissamut akisussaasuussanngilaq.

*Imm. 5.* Søfartsstyrelsi pisussaataaangilaq nammineeirluni misissuisarnissamut aammalu akuersissuteqartarnissamut, piginnaatitsissutini imm. 1 aamma 2 naapertorlugit tunniunnneqartuni pineqartut.

*Imm. 6.* Imm. 1 imaluunniit 2 naapertorlugit piginnaatitsissummik tunniussisoqaraangat, Søfartsstyrelsi, piginnaatitaasup tamanna kissaatigippagu, isumaqatigiissusiorsinnaavoq piginnaatitaasup ajoqusikkanut, mianersuaalliornermigut ajoqusigaanut piginnaatitsissummi pineqartunut, akisussaaffiginninneranik annikillillerinissaq pillugu.

**§ 23.** Aningaasaqarnermut inuussutissarsiornermullu ministeri maleruagassiorsinnaavoq, umiarsuit 45 m-nik sinnerlugillu takissusillit klassifigkationssselskabimi piginnaassusiligaasumi nalunaarsorneqarnissaat pillugu.

## Kapitali 9

### *Umiarsuit misissorneqarnerinut uninngagallartussanngortitaanerannullu atatillugu akiliuteqartarneq qularnaveerusiisarnerlu*

**§ 24.** Aningaasaqarnermut inuussutissarsiornermullu ministeri maleruagassiorsinnaavoq umiarsuarnik aalisariutinik misissuinerimut akiliutit pillugit, matumani Søfartsstyrelsi ukuninnga suliaqartillugu

- 1) misissuinerit akuersissutiginninnerillu il.il. Søfartsstyrelsimit ingerlanneqartut, piginnaatitsissummi § 22 naapertorlugu tunniunneqartumi pineqaralarunilluunniit,
- 2) misissuinerit, klassifikationsselskabit nalunaarsuiffiini ilanngunneqarnissaq pillugu malittarisassaniit § 23 naapertorlugu aalajangersarneqartuniit pinngitsoortitsiffiusut,
- 3) misissuinerit, qinnuigineqarnikkut nalinginnaasumik suliffissaatitap avataatigut ingerlanneqartut,
- 4) misissuinerit nunami allami imaluunniit Savalimmiuni ingerlanneqartut,
- 5) isumaqatigiissutaareersutut misissuinerit, aallartinneqarsinnaasimangitsut, kipitiinnartariaqakkat imaluunniit amutsiviup, umiarsuaatillit taakkualuunniit sinniisaasigut pissutsit pissutaallutik piffissarititaasup Aningaasaqarnermut inuussutissarsiornermullu ministerimit aalajangersarneqartup iluani naammassineqarsinnaasimangitsut, imaluunniit
- 6) misissuinerit, amutsiviup, umiarsuaatilinnit taakkualuunniit sinniisaannit kukkunerit siusinnerusukkut paasisat qanoq ilillugit iluarsineqarsimanerat pillugu naammassinnittumik nalunaarutiginniffiunngitsut.

*Imm. 2.* Umiarsuarnut allanut imm. 1-mi taaneqartut saniatigut Aningaasaqarnermut inuussutissarsiornermullu ministeri Søfartsstyrelsip misissuinerinut, inatsit naapertorlugu najoqqutassiarineqartunut, akiliuteqartarneq pillugu maleruagassanik aalajangersaasinnaavoq, matumanilu nakkutilliinikkut misissuinerit ilanngullugit eqqarsaatigalugit.

*Imm. 3.* Aningaasaqarnermut inuussutissarsiornermullu ministeri misissuinerinut akiliuteqarnissaq pillugu maleruagassiorsinnaavoq, qinnuiginninnikkut ingerlanneqartunut, ilanngullugit umiarsuarnik nunani allamiunik misissuinerit, kiisalu inatsit naapertorlugu najoqqutassiarineqartunut, angallatinik akuersissutiginninnermut certifikatinillu suliarinninnermut atatillugu inatsit tunngavigalugu allaaserineqartut.

*Imm. 4.* Umiarsuarnik nunami allamiunik umiarsualivimmi naalagaaffiup misissuisitsinerani kukkunernik, umiarsuup uninngagallartussanngortitaanissaanik pissutissaqalersitsisunik, paasisaqartoqarpat Søfartsstyrelsip nakkutilliinnermut akiliuteqartitsinissaq piumasarisinnaavaa. Uninngagallartitsineq taamaatinneqassanngilaq tamakkiisumik akiliuteqartoqartinnagu imaluunniit tamatumunnga qularnaveerusiisoqartinnagu.

*Imm. 5.* Aningaasaqarnermut inuussutissarsiornermullu ministeri imm. 1-4 malillugit aningaasanut ullormi akiliiffiusussami akilerneqanngitsunut ernialiinissaq pillugu maleruagassanik aalajangersaasinnavoq. Aalajangersagaq taanna naapertorlugu akiitsut pigisat akiligassanut akiliutigittinnerisigut akilersinniarneqarsinnaapput.

*Imm. 6.* (Kalaallit Nunaannut atortuulersinneqanngilaq).

**§ 25.** §§ 22-mi 23-milu selskabit umiarsuarnik klassilersuisartut, sulliviit allat inuillu ataasiakkaat taaneqartut sulinerminnut akiliutinik piumasaqarsinnaapput.

## Kapitali 10

## *Umiarsuarnik nakkutilliisuutit*

**§ 26.** Aningaasaqarnermut inuussutissarsiornermullu ministerip Umiarsuarnik Nakkutilliisuutit pilersissavai,

- 1) Aningaasaqarnermut inuussutissarsiornermullu Ministereqarfimmut Søfartsstyrelsimullu imarsiornermi navialitsaaliuinissaq pillugu siunnersuisartussat,
- 2) inatsisip atuuffiini ingerlaatsinik malinnaaffiginnittussat, aamma
- 3) imarsiornermi navialitsaaliuinissaq pillugu inatsisiliornermut tamatumunngalu atasumik aqutsinermut tunngatillugu kissaatigisanik siunnersuutinillu saqqummiussisartussaq.

*Imm. 2.* Skibstilsynsrådi inuttaqassaaq siulittaasumik ministerimit toqqarneqartussamik aamma ilaasortanik umiarsuaatillit, umiartortut umiarsualiorfillu sinniisuutitaannik ministerimit erseqqinnerusumik amerlassusilikkanik. Ministeri ilaasortassanik allatut sulialinnut sinniisuusussanik toqqaasinnaavoq.

*Imm. 3.* Aningaasaqarnermut inuussutissarsiornermullu ministeri rå dip suleriaasissaa pillugu aalajangersaassaaq.

## Kapitali 11

### *Suliffimmi avatangiisit pillugit siunnersuisartoqatigiit aamma sullivimmi avatangiisit pillugit sullissiviit*

**§ 27.** Aningaasaqarnermut inuussutissarsiornermullu ministeri suliffimmi avatangiisit pillugit siunnersuisartoqatigiinnik (Arbejdsmiljøråd) pilersitsisinnaavoq, sulisuusut umiarsuarmi navialitsaaliornissaat peqqinnissaallu siunertaralugit sulisussamik. Arbejdsmiljørådi inuttalersugaassaaq umiarsuarmi sulisunut sinniisinik taakkualu sulisitsisuinut sinniisunik amerlaqatigiittussanik. Skibstilsynsrådi arbejdsmiljørådimi ilaasortassanik toqqaasarneq pillugu maleruagassiussaaq.

*Imm. 2.* Inuit umiarsuarmi sulisut sinnerlugit isumannaatsuunissakkut peqqinnissakkullu sulianik isumaginnittussanik arbejdsmiljørådi sulinermi avatangiisitigut sullissisussanik pilersitsissaaq.

*Imm. 3.* Aningaasaqarnermut inuussutissarsiornermullu ministeri paasissutissiinermik suliniutinut aamma arbejdsmiljørådip siunnersuisartutut sulineranut kiisalu sullivimmi avatangiisitigut sullissisuusut umiarsuarnut Danmarkip avataani angalasunut angalanerannut tapiissuteqassaaq.

*Imm. 4.* Aningaasaqarnermut inuussutissarsiornermullu ministeri maleruagassiussaaq arbejdsmiljørådit aamma sullivinni avatangiisitigut sullissisut pilersinneqartarnerat, suliaasaat, sulinerat aningaasalersorneqarnerallu pillugit.

## Kapitali 12

### *Pineqaatissiissutissatigut iliuusissat*

**§ 28.** Pineqaatissiinermik eqqartuussisoqarsinnaavoq

- 1) §§ 9-13-imik imaluunniit 19-imi imm. 2-mik unioqqutitsisumut,
- 2) peqqussut naapertorlugu akuersissummut, immikkut ittumik akuersissummut imaluunniit akuerinninnermut atasumik piumasaqaatinik sumiginnaasumut, imaluunniit

- 3) peqqussut naapertorlugu imaluunniit peqqussut naapertorlugu suliaasut naapertorlugit peqqussutigineqartunik inerteqquataasunilluunniit malinnginngitsumut.

**§ 29.** Kinaluunniit, ikkarlinnermut, umiunermet allatulluunniit imaani ajunaarnermut mianersuaalliorujussuarnikkut imaluunniit sumiginnaarujussuarnikkut pisuusooq Kalaallit Nunaannut pinerluttulerinermet inatsit naapertorlugu pineqaatissinneqarsinnaavoq. Aamma taamaassaaq pineqartoq arlarleriarluni kukkunikkut sumiginnaanikkulluunniit taamatut pisoqarneranut pisuuppat.

*Imm. 2.* Umiarsuup naalagaa, mianersuaalliornikkut imaluunniit arlaleriarluni umiartortutut pissuserissaarnissamut akerliusumik iliorluni umiarsuarmik aqutsisoq imaluunniit iliuuseqarfiginnittoq Kalaallit Nunaannut pinerluttulerinermet inatsit naapertorlugu pineqaatissinneqarsinnaavoq. Umiarsuup naalagaa, peqqussutaasunik malittareqqusanillu, imartani umiarsuup ingerlaarnermini aqqusaagaani, sumiiffinniluunniit umiarsuup tikitaani atuuttunik malinnikkumanngitsoq Kalaallit Nunaannut pinerluttulerinermet inatsit naapertorlugu pineqaatissinneqarsinnaavoq.

**§ 29 a.** Kinaluunniit, imigassartorsimalluni umiarsuarmik ingerlassisoq imaluunniimmi umiarsuarmi navialitsaaliuinissamut pingaarutilittut atorfimmi sulianik ingerlataqartoq imigassartornikkut suliassaminik isumannaatsumik ingerlassisinnaananani ima imigassartorsimatigippat, ingerlaarnerup nalaani imaluunniit ingerlaarnerup kingornatigut imigassaq aavaniittoq 0,50 promille sinnersimallugu, Kalaallit Nunaanni pinerluttulerinermet inatsit naapertorlugu pineqaatissinneqarsinnaavoq.

*Imm. 2.* Imm. 1 angallatinut nuannaariartaatinut, angallatip ingerlassisuanut imaluunniit aqutturisinnaasaanut ilinniarsimanermik piunasaqaatinik najoqqutassaqaartinneqanngitsunut, atorussaatinneqanngilaq. Taammaattorli vandscooterinik angallatinik assigisaannilluunniit ingerlassisut imm. 1-imi pineqarpat.

*Imm. 3.* Imm. 1 atorussaatinneqanngilaq angallat nuannaariartaat umiarsualivimmi pitoqqappat imaluunniit pallitsaaliukkamik kisarsimaartarfimmiippat.

*Imm. 4.* Aammattaaq kinaluunniit imigassartorsimalluni umiarsuarmik ingerlassisoq imaluunniimmi umiarsuarmi navialitsaaliuinissamut pingaarutilittut atorfimmi sulianik ingerlataqartoq imigassartornikkut allanilluunniit ikiaroorniutinik atugaqarnikkut suliassaminik isumannaatsumik ingerlassisinnaanngitsoq Kalaallit Nunaanni pinerluttulerinermet inatsit naapertorlugu pineqaatissinneqarsinnaavoq.

*Imm. 5.* Imm. 1 nunami allami nuannaariartaatit angallammut assinganik atorussaatinneqarpoq, angallatip ingerlassisuanut imaluunniit aqutturisinnaasaanut ilinniagaqarsimanermik piunasaqaammik najoqqutassiaqaartinneqarsimasuuppat, tak. Imm. 2, oqaaseqatigiit siulliit, angallat danskit erfalasuut atorlugu ingerlanneqarpat.

**§ 29 b.** Politiit qaqugukkulluunniit piunasarisinnaavaat, inuit inatsimmi matumani imigassartorsimallutik umiartortut pillugit aalajangersakkani pineqartut, anernermit misissugassamik tunniussissasut.

*Imm. 2.* Politiit inuk aassiuinissamut quumillu misissugassamik tunniussinissaanut sassartissinnaavaa, pineqartup imigassartorsimalluni umiartorneq pillugu aalajangersakkanik unioqqutitsisimanerata ilimanaateqarnera pissutissaqaartinneqarpat, imaluunniit pineqartoq anernermit misissugassamik tunniussinissaminut piunasaqaatinneqarpat imaluunniit tunniussinissamut peqataasinnaanngippat. Tamatumunnga pissutsit immikkut ittut atuuppata aammattaaq politiit pineqartup nakorsamit misissortissinnaavaat.

§ 29 c. (ilanngunneqanngilaq).

§ 29 d. Umiarsuarmik ingerlassisuusoq imaluunniit aquttuatut maskinmesteriatulluunniit sullissisuusoq, tamatuminnga ingerlassisuusinnaanermik arsaarinniffigineqarsimagaluarluni atorfirmik ingerlatsippat, Kalaallit Nunaanni pinerluttulerinermut inatsit naapertorlugu pineqaatissinneqarsinnaavoq.

§ 29 e. Umiarsuarmik ingerlatsisinnaatitaaneq imaluunniit aquttutut maskinmesteritulluunniit sulisinnaatitaaneq eqqartuussuteqarnikkut imigassartorsimasutut pisuutinneqarluni umiartortumut arsaarinnissutaasinnaavoq. Arsaarinnissuteqarneq piumasaqaatitaqanngitsumik pissaaq, taamaattorli pissutsit najoqqutaralugit sakkukillisinneqarluni atuuttussatitaasinnaalluni.

*Imm. 2.* Umiarsuarmik ingerlatsisinnaatitaaneq imaluunniit aquttutut maskinmesteritulluunniit sulisinnaatitaaneq sakkortunerusumik pissutissaqartillugu aammattaaq arsaarinnissutaasinnaavoq § 29, imm. 1-imik 2-milluunniit unioqqutitsinermut eqqartuunneqarsimanermut atatillugu. Arsaarinninneq piumasaqaatitalerneqarsinnaavoq.

*Imm. 3.* Imm. 1 aamma 2 naapertorlugit piumasaqaatitaqanngitsumik arsaarinninneq pissaaq qaammatit 6-it ukiullu 5-at akornannik sivisussusilimmik imaluunniit allanngortitassaangitsutut pisussatut.

*Imm. 4.* Umiarsuarmik ingerlatsisinnaatitaaneq imaluunniit aquttutut maskinmesteritulluunniit sulisinnaatitaaneq piumasaqaatitaqanngitsumik arsaarinnissutaappat, unnerluussisussaataasut pineqartut imarsiornermik inuussutissarsiuteqarnermut allagartaat, piukkunnassutsimut allagartaat imaluunniit sukkasuuliamik ingerlatsisinnaanermut allagartaat aamma eqqartuussutip assilineqarnera Aningaasaqarnermut inuussutissarsiornermullu ministerimut nassiutissavaat. Umiarsuarmik ingerlatsisinnaatitaaneq imaluunniit aquttutut maskinmesteritulluunniit sulisinnaatitaaneq inummik ukiuni 3-nik sivisunerusumik atuuttussamik arsaarinnissutaappat, pisinnaatitaanerup pissarsiareqqinneqarnissaannut apeqqut piffissap arsaarinninniffiusup naanginnerani eqqartuussivinnut saqqummiunneqarsinnaavoq. Saqqummiussineq pissaaq Kalaallit Nunaannut pinerluttulerinermut inatsimmi § 114, imm. 3-mi maleruagassat naapertorlugit, siusinnerpaamillu pisinnaalluni inaarutaasumik eqqartuussuteqarnermit ukiut 2-k qaangiunneranni. Pisinnaatitaaneq taamaallaat tunniunneqarsinnaavoq pissutsit immikkorluinnaq ittut atuutsillugit.

*Imm. 5.* Piumasaqaatitalimmik arsaarinninneq pissaaq pineqartoq inaarutaasumik eqqartuunneqarnermiit ukiuni 3-ni misilinneqarnerup iluani umiarsuarmik ingerlatsisuussanngitsaq imaluunniit aquttutut maskinmesteritulluunniit sulissanngitsaq, pissutsit imaappata pisinnaatitaaneq arsaarinnissutaassasoq. Piumasaqaatitalimmik arsaarinninnermi arsaarinninnerup sivisussusissaanik aalajangersaanissaq kinguartinneqassaaq. Eqqartuunneqartoq misilitsiffiup iluani umiarsuarmik ingerlatsisuusinnaatitaanermik imaluunniit aquttutut maskinmesteritulluunniit sulisinnaatitaanermik arsaarinnissuteqarnissamut nassataqartussamik unioqqutitseqqippat, eqqartuussivik unioqqutitsinermut tamatumunnga siusinnerusukkullu inatsisinik unioqqutitsisimanermut ataatsimoorussamik arsaarinninnissamut aalajangersaassaaq.

*Imm. 6.* Imigassartorsimalluni umiartortoqarsimatillugu umiarsuarmik ingerlatsinnaatitaanermik imaluunniit aquttutut maskinmesteritulluunniit sulisinnaatitaanermik piumasaqaatitaqanngitsumik arsaarinninnissamut politiit patsisissaqarsorinnikunik, pisinnaatitaaneq taanna politiit arsaarinnissutigigallarsinnaavaat, taamaattorli eqqartuussisup susassaartup eqqartuussinikkut inaarutaasumik aalajangiineqalersinnagu politiit aalajangiinerat atorunnaarsinnaavaa. siullermeersumik eqqartuussinermi eqqartuussut pinngitsuutitsineruppat eqqartuussullu unnerluussisuusunut allanut ingerlateqqinneqassappat, unnerluussisussaataasut, umiarsuarmik ingerlatitsisinnaatitaanermik imaluunniit aquttutut maskinmesteritulluunniit sulinerup eqqartuussummik ingerlatitseqqinnerup aalajangiiffiginiarneqarnerata nalaani atuutiinnarnissaa

pillugu eqqartuussivimmut nangitseqqiffissamut suliassiissuteqarsinnaapput, tamanna pillugu eqqartuussutikkut aalajangiiffiginnittussamut. Umiarsuarmik ingerlatitsisinnaatitaanermik imaluunniit aquttutut maskinmesteritulluunniit sulisinnaatitaanermik arsaarinnikkallarnerup sivisussusia arsaarinninnerup sivisussusissaanit ilanngaatigineqassaaq.

*Imm. 7.* Umiarsuup naalagaa, aquttoq maskinmesteriluunniit sulisinnaatitaanermik arsaarinniffigineqarpat, tamanna eqqartuussuteqarnermi aalajangiiffigineqassaaq, tulleriinneri malillugit umiarsuup naalagaa aquttutut sulisinnaanersoq, aamma aquttoq maskinmesteriluunniit atorfinni appasinnerusuni sulisinaanersut. Taamaattoqassappat Aningaasaqarnermut inuussutissarsiornermullu ministerip pineqartumut imarsiornermik inuussutissarsiorsinnaanermut allagartaq pisariaqartinneqartoq nalunaarutigissavaa. Taamaattorli ilaannakortumik arsaarinnineq pisinnaanngilaq pineqartoq imigassartorsimalluni umiartorsimanermut pisuutinneqarpat.

**§ 30.** Umiarsuarnik apuisoqartillugu, imaluunniit umiarsuup ingerlaarnerani assigisaannilluunniit iliornerni umiarsuarmik allamik ajoqusiinermut inunnilluunniit umiarsuarmitunuk usinilluunniit ajoqusiinermut pissutaasunik pisoqartillugu umiarsuup naalagaa, nammineq umiarsuarmini, inuttaminik ilaasuminillu imatut aarlerinartorsiorfissaqartinnagu, umiarsuarmut allamut inuttaanut ilaasuinullu ikiuinissamik sumiginnaappat, aammalu umiarsuarmini radiukkut kalerrisaarinissamut, aternik angerlarsimaffigisanillu taamatullu sumiiffimmik umiarsualivimmilluunniit umiarsuup aallarfigisaanik sumukarniarfigisaanillu nalunaaruteqarnissamut sumiginnaappat, pineqartoq taanna Kalaallit Nunaanni pinerluttulerinermut inatsit naapertorlugu pineqaatissiisummik eqqartuunneqarsinnaavoq.

**§ 31.** (Kalaallit Nunaannut atortussaatinneqanngilaq).

**§ 31 a.** § 3, nr. 3 naapertorlugu maleruaqqusanik unioqqutitsineq pillugu suliassani, akiliisitaanermiit sakkortunerusunik pineqaatissiivigisariaqartutut isumaqarfiginangitsuni, Søfartsstyrelsen akiliisitsinissamik saqqummiussinermi neriorsuutigisinnaavaa suliassap eqqartuussinertaqanngitsumik aalajangiiffigineqarnissaa unioqqutitsisup unioqqutitsinermiut pisuunini uppersarsarlugu nalunaarutigisimappagu aammalu akiliisitsinissamik saqqummiussinermi akiliisitsissutissatut taaneqartut piffissap erseqqinnerusumik taasap naannginnerani akilerumasimappagit. Piffissaliussaq qinnuigineqarneq malillugu Søfartsstyrelsen sivitorneqarsinnaavoq.

*Imm. 2.* Unnerluussutitut allakkiat imarisassaannut piumasaqaatit aammalu pasineqartup oqaaseqaateqarnissamut pisussaataaanninnera pillugit malittarisassat kalaallit eqqartuussisarnermik inatsisaaniittut taamatulli atortinneqassapput akiliisitsinissamik saqqummiussinernut.

*Imm. 3.* Inatsisinik unioqqutitsisimasup akiliisitsissutissat akuersissutigippagit malersueqqittoqassanngilaq.

**§ 31 b.** Umiarsuarmit aalajangersakkanik § 3, nr. 3 naapertorlugu suliaasunik unioqqutitsisoqaraangat, umiarsuaq politiinit imaluunniit Søfartsstyrelsen aallatsaaliugassanngortitaasinnaavoq.

*Imm. 2.* Aallatsaaliuisoqarsinnaavoq, akiliisitsissutit suliassallu aningaasartuutitaasa akilersinniarnissat pisariaqassappat, taamaallaalli aningaasat taaneqartut akilerneqarnerat imaluunniit qularnaveerusiisoqarnera tikillugu. Suliassap inaarutaasumik aalajangiiffigineqareerneraniit qaammatit marluk ingerlaneranni tamanna pinngippat, umiarsuaq arsaarinninniutaasinnaavoq. Tamannali pisinnaassanngilaq umiarsuarmik atuisuusooq piginnaatitaanani umiarsuarmik piginnittuusimappat.

*Imm. 3.* Imm. 1 naapertorlugu aallatsaaliuinialernermi kalaallit eqqartuussisarnermut inatsisaani atortuutinneqassapput arsaarinnittarneq pillugu kapitali 5, imm. 1 aamma 2 malillugit allannguutitai ilanngullugit.

**§ 32.** Selskabit il.il. (inuit inatsisilerinermik ingerlassisut) unioqqutitsisuusimappata inuk inatsisilerinermik ingerlassisuusooq taamatut atuuffeqartillugu akiliisitaanissamut akisussaatinneqassaaq. Naalagaaffik, Kalaallit Nunaanni Namminersornerullutik Oqartussat, kommuni, kommunimi suleqatigiissut, kommunalbestyrelsit aamma nunaqarfinni aqutsisut il.il. pillugit Inatsisartut inatsisaanni § 64-imi pineqartut, imaluunniit nunaqarfimmi aqutsisut unioqqutitsisuusimappata, pisortatut oqartussaasoq pineqartoq taamaatut atuuffeqartillugu akiliisitaanissamut akisussaatinneqassaaq.

*Imm. 2.* Inuk, inatsisilerinermik ingerlatsisoq, suliffimmi avatangiisit pitsaasuunissaannut isumannaatsuunissaannullu pisariaqartunik sunik tamanik iliuuseqarsimasooq, taamaattoq pillarneqarsinnaanngilaq pisuni, sulisoq § 12-imi imaluunniit § 3, nr. 5, aamma imm. 3 naapertorlugu aalajangersarneqartunik unioqqutitsippat, unioqqutitsineq inummut namminermut illersuuniutinik, milluaassutikkut aniatitsiniutinik, illersuutinik atortunik imaluunniit isumannaallisaatinik atuinermut tunngassuteqartunik unioqqutitsineruppat, nammineq illersornissamut taamaallaat siunertarineqartunut.

*Imm. 3.* Najoqqutassiani, inatsit naapertorlugu tunniunneqartuni, Kalaallit Nunaanni pinerluttulerinermut inatsit naapertorlugu pineqaatissiisutissat aalajangersarneqarsinnaapput.

*Imm. 4.* Pineqaatissiinermut suliaq Kalaallit Nunaata avataani eqqartuussisutiginerpat, imaluunniit inummut ingerlatseqatigiiffimmulluunniit, tak. Imm. 1, Kalaallit Nunaanni najugalimmut imaluunniit ingerlatsisumut, tunngappat, pineqaatissiinermut taarsiullugu akiliisitaanermik imaluunniit parnaarusnaanermik pineqaatissiinermut eqqartuussisoqarsinnaavoq.

## Kapitali 13

### *Atortuulersitsineq il.il.*

**§ 33.** Peqqussut atuutilissaaq ulloq 15. september 2008.

*Imm. 2.* Matumunnga peqatigitillugu uku atorunnaarsinneqarput:

- 1) Imarsiornerup isumannaatsuunissaanik inatsisip Kalaallit Nunaanni atortuulersinneqarnissaanik peqqussut nr. 607 25. juni 2001-imeersoq.
- 2) Imiartortut pillugit inatsisip aamma imarsiornerup isumannaatsuunissaa pillugu inatsisip allanngortinneqarneri pillugu Kalaallit Nunaanni atortuulersinneqarnissaanik peqqussut nr. 729 19. august 2003-meersoq.
- 3) Imarsiornerup isumannaatsuunissaanik inatsisip, umiarsuarni inuttat pillugit inatsisip, aqqartartut suliaat aamma aqqartartut atortuutaat il.il. inatsisip aamma inatsisip assigiinngitsut allat allanngortinneqarneri pillugu Kalaallit Nunaanni atortuulersinneqarnissaanik peqqussut nr. 212 23. marts 2005-imeersoq.
- 4) Imarsiornerup isumannaatsuunissaanik inatsisip aamma umiartortut pillugit inatsisip allanngortinneqarnissaannut inatsisip ilaata Kalaallit Nunaanni atortuulersinneqarnissaanik peqqussut nr. 213 23. marts 2005-imeersoq.

*Tunniunneqarput Amaliensborgimi, ulloq 25. august 2008*

DRONNINGIP AQQANI:

JOACHIM

DANMARKIMUT PRINS

RIGSFORSTANDER

/Bendt Bendtsen